

NANI KELE MUNTU YAYI?



Nzambi sakumuna nge, mpangi-bakala. Ya kele mbote mingi na kukwisa na yinzo ya Mfumu.

² Mu banza ti mu vwandaka longuka mwa Masonuku, na mwa ntangu me luta, mpe Ya me tuba ti ntangu Yesu kumaka penepene ya Jérusalem, ti bilandi zangulaka meso mpe ba monaka mbanza ya santu na ntama, mpe ba bandaka na kusepela mpe kutuba, ti, “Ntangu yayi kimfumu ke vutukila diaka.”

³ Mpe bakala mosi yina vwandaka zonza, to vwandaka tubila nzietolo mosi ya malu-malu na Palestine, mpe yandi tubaka ti bantu ntangu yayi, na mvula me luta, me kuma na kisika mosi ti, ntangu ba ke mata na kiwanda mpe ke tala mbanza na virage, nzila mosi yina Yesu mpe bilandi lutaka na ntangu yina, ti ntangu bawu ke tala mbanza, bawu ke banda na kudila.

⁴ Beno zaba, mu ke kwikila, ti ya vwandaka na kima yina bilandi yina, na bilumbu yina, kuwaka, ti—ti kimfumu ke vutukila diaka.

⁵ Mpe ntangu yayi ntangu me belama. Mpe mu ke kwikila ti nsatu yina kele na zulu ya bantu, ti kimfumu me kuma penepene na kuvutuka diaka.

⁶ Mpangi Neville, pasteur ya beto ya luzolo mpe ya kusakumuka, me tuba na munu kaka samu na ngolo ya reveil ke kwisa awa na tabernacle, na mwa bankokila, na kusambila samu na yawu. Mpe mu tubaka na yandi, mu banzaka ti ya ke vwanda kima mosi ya lusakumunu.

⁷ Beno lenda kaka ve kuzwa ba-reveil mingi. Mpe na bantangu mingi beto ke kuzwaka dibanza ya yimbi samu na reveil. Reveil kele ve kieleka mutindu kukotisa bamambeke ya malu-malu, kasi ya kele kusikimisa yina beto ke na yawu dezia. Mpe mu kele . . .

⁸ Mu ke zola kutuba mutindu yayi, samu mu ke tuba yawu na kati ya ntima ya munu. Ti mu me banda na kumona nsatu ya kuswaswana na kati ya tabernacle kulutila yina vwandaka kubanda ntama, nsatu ya—ya mudindu ya mutindu ya kimpeve, mutindu ya vwandaka, kubanda ntama; ti kima mosi me kota, mpe ya me vwanda na lufulu ya kieleka. Mpe mu ke na kivuvu ti Nzambi ke sakumuna mwa dibuundu yayi, mpe . . . ? . . . diaka na ngolo.

⁹ Mpe mu ke mona manaka ya lutungu ya kivinga yayi, mpe mu ke banza ya kele kima ya nene. Na yina, na mwa ntangu fioti to na manima, beto bantu ya biboba ke katula kinwaninu mpe ke pesa yawu na maboko ya bana ya beto, mpe beto ke mata na Kikalu yina ya wolo.

¹⁰ Kilumbu yina mu me luta kati-kati ya nzila ntangu yayi, ndilu ya bamvula makumi tanu. Mu lendaka kaka kundima yawu ve. Ya ke monana ti ntama mingi ve mu vwandaka pesa madia samu na Chris Meisner, mu vwandaka na bamvula pene ya kumi na nana, kumi na sambanu, kumi na nana. Kasi ya ke monana ti ntangu me kwenda. Ya ke monisa kaka ti awa beto kele ve na mbanza ya ntangu nionso, kasi beto ke na kusosa Yina ke kwisa. Mpe ya kele Mbanza yina kisika Nzambi kele mutungi, mpe ya ke na nsuka ata fioti ve kuna.

¹¹ Na suka yayi, mutindu mu vwandaka tuba na dilongi ya Kilumbu ya Bamama, mpe mu vwandaka meka na kutula mama ve mutindu yandi kele ya kieleka, na kiboba, na mifutu, mpe nionso yayi, na ba-béquille ya yandi, to na fauteuil roulant, to na fauteuil, mpe mwa kinkuku ya bafololo me vwanda pene-pene ya yandi; kasi mama na mvumbukulu, yina me vutuka diaka ntwenia, mpe me telama, ke sema mutindu ntinu-kento. Ya ke mutindu yina mu ke zola kutalisa mama ya munu. Mu ke zola ve kutalisa yandi mutindu yandi kele bubu yayi, kiboba. Mu ke zola kutalisa yina ke na kwisa. Mpe mu zaba ti beno ke na nsatu yina samu na bamama ya beno. Beno banza na yandi mutindu yandi kele kieleka na kati ya ntima ya yandi. Ata ti mingi . . . mutindu poète me tuba, “Luzingu vwandaka ve ya kukondwa mpasi samu na yandi, kasi yandi ke vwanda ya kukubama samu na kuzinga nionso yina diaka, kaka samu na kusala kima mosi samu na beno.” Na yina Nzambi ke sala ti yandi kuzinga kukonda nsuka na beno. Na yina mu ke na kiese samu na yawu.

¹² Mu zaba ve samu na yinki, mu me sala nsamunu yayi, na suka yayi, ti mu ke tuba na nkokila yayi, kana Mfumu kuzola, na zulu ya: *Nani Kele Muntu Yayi?* Ya kieleka mu zaba ve wapi mutindu mu ke sala yawu. Kasi mu vwandaka na kizitu mingi tii pene ya ngunga mosi na minuti kumi me luta, na masolo na manima ya midi nionso, mpe mu me vwanda na mambu ya ngudi mpe—mpe balubokilu ya nswalu-nswalu. Mu lendaka ve kusala yawu.

¹³ Mpe mu ke zola beno landila na kusambila samu na Docteur Sam. Yandi—Yandi ke na kukuma mbote, mpe beto ke vutula matondo mingi. Mpe Docteur Baldwin mpe Mama Baldwin bawu zole ke na kubeluka. Ba ke na kukuma mbote.

¹⁴ Mu ke zola beno kutula mosi yankaka na liste ya beno ya bisambu, na manima ya midi yayi. Ya kele Harry Lease awa, pharmacien. Harry kele nkundi ya munu mosi. Mpe ntangu nionso mu me zaba yandi, mu banzaka ti yandi vwandaka Muklisto, tii na manima ya midi yayi, ntangu mpangi ya yandi ya bakala me sala lombilu samu na mpulusu ya moyo ya yandi. Mpangi Mike Egan me nata . . . administrateur ya beto awa, me nata nsangu. Mpe Harry ke na kuluta na ntangu mosi ya mpasi, kuna na lupitalu. Mu zabaka ve ti yandi vwandaka na luzitu ya nene mutindu yina samu na munu; kasi yandi me manga na kuyamba pasteur ya yandi mosi na manima ya midi yayi, to

pasteur ya dibuundu yina yandi ke kwendaka, mpe yandi zolaka ti mu kwisa kutala yandi. Mpe mu ke zola kwenda kutala yandi. Na yina, beno sambila samu na Harry.

¹⁵ Beto ke na kiese awa, na nkokila yayi, na kumona, na bankundi ya munu awa, yina me katuka na Géorgie, Mpandi Welch Evans mpe dibuta ya yandi. Mu ke mona, diaka, banzenza yankaka yina mu me zaba ve, yina vwandaka kukondwa ntembe awa na suka yayi.

¹⁶ Kana mu me sala ve kifu, mu ke mona Mpangi-bakala mpe Mpangi-kento Elmer Collins kuna na manima, ya Phoenix, na Arizona. Oh, beno me soba ve. Beno ke monana mutindu beno lendaka lwata bilele ya beno ya kisadi ya chemin de fer, mpe—mpe mutindu beno me katuka na chemin de fer. Mpe kuvutuka ya mbote na yinzo! Mu lenda ve kulomba na beno na kubikala ya kutelama awa, samu beno me kuzwa kisika ya kulutila mbote, beno me mona, ya kele mbote mingi, Phoenix. Mu ke zola kuzinga kuna, kilumbu mosi, munu mosi.

¹⁷ Na manima mu ke mona Mpangi Smith awa, ya Dibuundu ya Nzambi, kuna. Mpangi Smith, ba pesaka munu, mwa buku ya nge, kilumbu yina, to mazono na manima ya midi, na nsukinina. Mu me tanga yawu ntete ve, kasi ya kieleka mu ke ndima yawu, na yina mu zaba ti nge me sonika yawu. Ya fwana vwanda Masonuku ya mbote, ya kieleka, ya kieleka. Nzambi sakumuna nge. Mpe mu ke na kivuvu ya kele lunungu.

¹⁸ Mpe mingi yankaka, mu lendaka tanga. Kukwisa ya mbote na beno nionso awa na tabernacle. Mpe mu sepelaka na nkunga yina, na suka yayi, ya Mpangi-kento Stricker yina ba vwandaka yimba, “Yandi ke tala yandi, na treillis.” Bampangi ya munu ba-Mennonite awa, mu ke na kiese na kuvwanda na bawu awa. Mpe, oh, beno nionso! Nkundi mosi awa, mu ke kwikila, yina me katuka kuna na Illinois, mwana ya yandi ke na kubaka ndinga na bande kuna na manima, mu me kuzwa ntangu ya kuvwanda na bawu diaka. Mpe mingi, mu lendaka. . . Beno banza ve ti mu me mona beno mpamba kana mu me bokila ve nkumbu ya beno, kasi mu zodila beno kukwisa ya mbote na beno nionso.

¹⁹ Ntangu yayi beto tanga na nkokila yayi, samu na dilongi ya Masonuku, kuna na Matthieu kapu ya 21, kubanda na nzila ya 1, mpe kulandila tii kuna, na nzila ya 11, diaka.

Mpe ntangu bawu vwandaka ntama mingi ve na Jérusalem, ba kumaka kuna, mpe kumaka na Bethphagé, na mongo ya Olive, na yina Yesu fidisaka bilandi zole,

Mpe zabisaka bawu, Beno kwenda na bwala yina kele na ntuala, mpe ntangu beno ke kuma kuna beno ke mona mbulukuku ya kento ya kukangama na yinti, mpe mwana ya yandi na lweka: beno kangula yawu, mpe beno natina munu yawu.

Mpe kana muntu zabisa na beno diambu, beno tuba ti, Mfumu kele na yawu nsatu; mpe muntu yina ke bika ti beno nata yawu na nswalu nionso.

Mambu yina salamaka, samu na kulungisa mambu yina tubaka profete, na kutubaka,

Beno tuba . . . na bana-bakento ya Sion, Beno tala, Ntinu ya beno ke na kukwisa na lembami . . . yandi me vwanda na zulu ya mbuluku ya kento, mpe na zulu ya mwana ya mbuluku.

Mpe bilandi kwendaka, mpe salaka mutindu Yesu zabisaka bawu,

Mpe bawu nataka mbuluku ya kento na mwana ya yawu, bawu tulaka binkuti ya bawu na zulu ya yawu, mpe Yesu vwandaka na zulu ya yawu.

Mpe nkonga ya nene ya bantu vwandaka tanda binkuti ya bawu na nzila; mpe vwandaka zenga makasa ya bayinti, mpe vwandaka tanda yawu na nzila.

Mpe nkonga ya bantu yina vwandaka tambula na ntwala, mpe yina vwandaka tambula na manima ya Yesu, vwandaka boka, na kutubaka, Ozana na mwana ya David: Bika Mfumu Nzambi kusakumuna muntu yina ke na kukwisa na nkumbu ya yandi; Ozana nkembo na Nzambi na mazulu.

Mpe ntangu yandi kotaka na Jérusalem, mbanza nionso ninganaka, mpe bantu vwandaka yufula, Nani kele muntu yayi?

Mpe nkonga ya bantu tubaka, Yayi kele Yesu profete ya Nazareth . . .

Beto kulumusa bayintu ya beto samu na bisambu.

²⁰ O Mfumu, beto ke kukiyufula yinki beto zolaka tuba, kana beto zolaka zinga na bilumbu yina. Kasi beto ke na kuzinga na kilumbu ya nene, ntangu beto ke vingila Yandi kukwisa. Mpe mutindu beto ke na kukubama, Mfumu, na kukubikaka bantima ya beto, mpe beto ke nata bambuma nionso yina beto lendaka buka na bilanga, awa mpe na bisika ya nzenza, beto ke banza mpe beto ke vingila na ntima tiya-tiya ntangu yina beto ke mona Yandi ke kwisa, ya kumata na zulu ya mpunda ya mpembe, na kukulumukaka na myelo ya Nkembo, samu na kukitula mpe kusoba banzutu ya beto ya kubeba, na nzutu ya nkembo ya kufwanana na ya Yandi, kisika disumu mosi ve to kidimbu mosi ve ya lufwa ke kota ata fioti ve. Mpe beto ke mona Yandi mutindu Yandi kele, mpe ke zinga, mpe ke zola Yandi na kati ya bansungi nionso yina ke kwisa.

²¹ Beto ke tonda Nge samu na yinzo-Nzambi yayi mpe samu na pasteur ya yawu, mpe samu na ba-administrateur mpe ba-diacres, mpe samu na muntu nionso yina ke kwisaka awa; mpe

samu na banzenza yina kele na kati ya beto, yina kele mameme ya lupangu mosi, kasi ya corral yankaka. Beto ke lomba ti Nge ke sakumuna bawu, na nkokila yayi, na Mvwandulu ya Nge.

²² Mpe disa beto na Ndinga ya Nge, ti beto ke katuka awa, na nkokila yayi, na dikani ya kuvwanda Baklisto ya kulutila mbote na yina beto vwandaka. Bika beto kwenda na kivuvu ya malumu na kati ya ntima ya beto, mpe na kiese, na kuingilaka Nkwizulu ya Yandi.

²³ Kana na siansi ya kele na bayankaka na kati-kati ya beto, yina kele ya kubela mpe na kati ya mpasi, beto ke zimbana ve na kusambila samu na bawu. Ti ba . . . Kana ba me kota na kivinga yayi na nkokila yayi, kisika beto me vukana samu na kusambila, yina me kota, bambevo, bika bawu vutuka mbote.

²⁴ Mpe beto ke lomba samu bayina ke na kukuma mbote, na bayinzo mpe na balupitalu, mpe bayina kele na zulu ya bambeto ya kimbevo. Beto ke sambila, O Nzambi, ti mawa ya Nge kukulumuka na zulu ya bawu.

²⁵ Beto ke sambila samu na bayina ke kipeke ve, na nkokila yayi, bayina me mekaka ntete ve mpe me monaka ti Mfumu kele mbote, bayina me zaba ve yina zola kutuba kuvwanda ya kuzolama na Nzambi. Ba ke bakula kaka ve yina ba ke na kukondwa. O Nzambi, ti mwa nsamunu na radio, to kima mosi, kusimba bantima ya bawu, mpe ba-émotion ya bawu kutala na Nge na ntwala kielo ya mawa kukangama mpe ti ba vwnda na nganda, samu na kuluta na lusambusu kukondwa mawa.

²⁶ Sadisa beto, Mfumu. Beto ke sambila mpe ke lomba bima yayi na Nkumbu ya Mfumu Yesu, mpe samu na nkembo ya Yandi beto ke lomba yawu. Amen.

²⁷ Bantu vwandaka ya kufuluka pene-pene ya bamwelo, mpe babala-bala ya kufuluka na bantu, mpe ya vwandaka na ata kivinga ve samu na bantu na kulala. Ba vwandaka ya kutandama na nganda ya kibaka, bisika nionso na ntoto, samu ya vwandaka paki. Mpe bantu katukaka bisika nionso na yinza yina me zabana ntama, samu na kusambila na ntangu yayi. Ya vwandaka ntangu yina mwana-dimeme ya paki kufwaka. Mpe . . . Ya vwandaka talisa luvukulu na Egypte, kimpika. Mpe ba vwandaka sala yayi konso mvula. Konso mvula, paki yayi na nene vwandaka salama. Mpe ya vwandaka mosi ya bantangu ya kulutila nene ya . . . to mambu ya nsambulu ya ba-Jiuf, samu ya vwandaka kubanda ntangu yina ba katulaka bawu na kimpika.

²⁸ Bantu nionso ke zolaka kubanza na yawu, ntangu yina ba katulaka bawu na kimpika. Wapi mutindu ti mosi na mosi ya beto, na nkokila yayi, lenda vutuka na ntangu yina ba katulaka beto na kimpika! Yinki ya zola tuba samu na beto!

²⁹ Mu lenda bambuka moyo na nzingulu ya munu mosi, mutindu ntima ya munu ya mputu ya kileki vwndaka na nsatu ya kusimba Nzambi. Mu banzaka, “Oh, kana mu lendaka kaka

kumata mpe kukonkota na kielo ya Yandi, mpe kusolola na Yandi mwa ntangu fioti!” Mpe, na yina, beno zaba disolo ya munu. Mu bakaka papié na kilapi, mpe mu zolaka kusonika na Yandi mukanda, samu mu lendaka ve kusolola na Yandi. Mpe mu zaba ti Yandi vwandaka zinga na kati ya mfinda, samu mu me kuwaka Yandi, mpe mu me monaka Yandi kutambula na kati ya mfinda. Mpe ya vwandaka na nzila mosi, ya ntama yina mu vwandaka luta ntangu nionso ntangu mu vwandaka kwenda zomba to mu vwandaka kwenda loba. Mu banzaka, “Mu ke namika yawu kaka na zulu ya yinti, mpe mu ke sonikila yawu Tata Yesu.” Kaka mutindu ya kukatula kizitu yango na ntima ya munu.

³⁰ Oh, na nkokila yina, kuna! Mu lendaka zimbana bamvula ya munu, mu lendaka zimbana mpe nkumbu ya munu kilumbu mosi, kasi mu lenda ata fioti ve kuzimbana ngunga yina ntangu Yandi katulaka munu na kimpika ya disumu. Kima mosi salamaka, kuna na kati ya munu, ti ya me sadisa munu na kati ya bangunga ya nene na kati ya mudidi. Ngunga ya katulaka munu na kimpika, bizitu ya disumu bikaka munu, mpe mu kumaka muntu ya malu-malu. Mu kumaka kivangu ya malu-malu kati na Klisto Yesu, kubanda ntangu yina.

³¹ Mpe ba-Juif yayi, ba vwandaka kwisa, konso mvula. Mpe ya vwandaka na yinto mosi na kati ya dibuundu. Mpe ba vwandaka baka dimpa, mpe matiti ya ndudi, mpe mwana-dimeme, mpe ba vwandaka kunwa na yinto yayi na kati ya dibuundu. Mpe ba vwandaka sepela kintwadi samu ti Nzambi talisaka bawu luzolo ya mbote. Na yina, mutindu ya vwandaka ntangu ya paki, mpe kele ve kaka ya vwandaka paki, kasi ya vwandaka paki ya luswaswanu.

³² Beno zaba, ya ke na bantangu yankaka yina beto ke kwendaka na yinzo-Nzambi mpe... Beto ke zolaka ntangu nionso kukwenda, kasi ya kele na bantangu yankaka yina kima mosi ya luswaswanu ke salama.

³³ Mpe yayi vwandaka mosi ya bantangu yina. Mupepe vwandaka ya kifuluka na kuingila, kaka mutindu ya kele bubu yayi. Meso nionso ya bayina vwandaka zola Yandi vwandaka vingila Yandi kukwisa na kutalaka na mwelo.

³⁴ Mpe mu ke kwikila ti ya kele mutindu mosi bubu yayi, samu bayina ke zolaka Yandi ke na kuingila Yandi. Mupepe kele ya kifuluka na kuingila.

³⁵ Ntangu, beto ke na kuzinga kilumbu yayi, ntangu kieleka ntoto, me kuma poudrière mosi ya nene. Mpe science ke na kutuba na beto, “Ya me bikala kaka minuti tatu na ntwala ya kati-kati ya mpimpa.” Mpe mu ke banza ti beno tangaka, mutindu munu, kilumbu yina, ti disolo ya général yayi ya basoda, ya tubaka, ti, “Kana ya ke vwanda na mvita yankaka, ya ke vwanda kaka minuti zole to tatu.” Na bantangu ya ntama ya bitumba, mpe ya kubulana minduki ya tiya, mpe kutimuna

mabulu ya mvita, ya me lutaka. Ba ke tuba ti mvita yina ke kwisa ke vwanda kaka minuti zole to tatu. Kilumbu mosi, muntu mosi ya zoba ke zimbisa bumuntu ya yandi mpe ke bula mosi ya ba-bombe yina. Mpe ntangu ba ke sala yawu, beto ke na ba-poste, bisika nionso, samu na kubula yawu diaka. Yinza ke zinga na yawu ve.

³⁶ Muntu nionso na Paki zabaka ti kima mosi zolaka salama, kasi ba zabaka ve yinki kaka ya vwandaka.

³⁷ Mpe ya kele mutindu yina bubu yayi. Bantu nionso me zaba ti kima mosi ke zola salama. Muntu nionso me zaba yawu. Beno lenda tuba na nsumuki, beno lenda tuba na muntu ya mumbongo, beno lenda tuba na muntu nionso, mpe, oh, ya kele ntangu mosi ya mpasi samu na yinza.

³⁸ Kasi beno lenda tuba na bakala mosi to kento mosi yina ke na kuingila nkwezulu ya Yandi, mpe nkembo ke sema, na kizizi ya bawu. Ba ke vingila diambu yina ya nene. Na yina mipepe ke ya kufuluka diaka, na kuingilaka kima mosi kusalama. Yinza me zaba ve yina ke zola salama, kasi Dibuundu ya Nzambi ya moyo me zaba yina ke zola salama. Ba me zaba ti ntama ve mpungi ke bula, mpe beto ke mona Yandi ke kwisa, na Nkembo, na zulu ya mpunda ya mpembe, mpe makesa ya Mazulu ke landa Yandi. Mpe bayina kufwaka kati na Klisto ke zanguka mpe ke mata samu na kukutana na Yandi na mupepe. Yawu yina beto ke na kuingila. Beto ke vingila yawu.

³⁹ Mpe ba me tuba na beto ti mioyo ya bamama yina, mpe nionso yina, yina beto me tubila na suka yayi, kele kaka na nsi ya autel ya Nzambi, ya ke na kuboka, “Wapi ntangu, Mfumu? Wapi ntangu?” Mama ke zola kumona beno mutindu beno ke zola mona yandi. Mpe bankundi ya beto ya luzolo ke zola kukutana na beto mutindu beto ke zola kukutana na bawu.

⁴⁰ Yinki lukutakanu ya ke vwanda, ntangu Yandi ke kwisa! Samu na kukutana na bankundi ya beto mpe kumona bawu na nzutu ya bawu ya mvumbukulu, mpe ya nkembo, mpe kutambula na bilandi ya mvumbukulu, ntangu beto ke mona kikalulu ya bawu, mutindu ya me soba, lembami ya bawu mpe lutondo ya bawu. Mpe ya ke vwanda ve na kinkuku ya bizitu, mpe bampasi, samu beto nionso ke vwanda na Seko samu na kuzinga kintwadi.

⁴¹ Oh, nsungi yayi ya nene ya kidi-kidi yina beto ke na kuzinga, yina ke beto ke kondwa ntangu samu na nionso, beto ke mata, beto ke kukiyangisa, mpe beto ke kangama na bima, na yina, ya ke kilumbu mosi ya mpasi.

⁴² Na yina, mutindu ba vwandaka vingila kima mosi kusalama, ya vwandaka mpasi mingi ti bantu mingi na paki monaka Yandi ata fioti ve. Kuna, ba zabaka ti kima mosi ke zola salama, kasi ba lendaka mona Yandi ve.

43 Mutindu mosi ya ke vwanda na Nkwizulu ya Mfumu. Ya ke na bantu mingi ke na kuyangama, bubu yayi, yina zaba ti kima mosi ke zola salama, kasi ba—ba ke mona Yandi ata fioti ve. Na yina Yandi ke kwisa na ntangu ya swi ya kati-kati ya mpimpa, samu na kuzangula Dibuundu ya fioti yina ke na kukwikama mpe ke tala mpe ke vingila Yandi. Yandi ke kwisa samu na bantu yina mpe ke zangula bawu. Bantu mingi ya yinza yina ke na kuzinga na bakubendana, mpe ke kudisa mioyo ya bawu na bima ya yinza, ke zaba ata fioti ve yina ke salama, tii Dibuundu ke kwenda na Nkembo, samu Yandi ke kwisa mutindu muyibi na kati-kati ya mpimpa mpe ke zangula bawu. Na yina beto ke mona ti beto ke vutuka diaka na kisika mosi. Ntangu yayi beto ke mona, ti, na kuvingila yayi, ti Nzambi ke kwisa na bayina. . . Na kati ya Masonuku, ya kele diambu ya mutindu mosi. Ti ba kele. . . Yandi ke monana ntangu nionso na bayina ke vingila Yandi, ntangu nionso na bayina ke zola kumona Yandi. Mpe mu ke ndima ti ya kele kivuvu yina kele na bantima ya beto na nkokila yayi.

44 Ya me luta bangonda sambanu, mu banza, mu vwandaka pesa kimbangi na bantu. Mpe mu tubaka, “Oh, kubanza na yawu, ti Yandi ke kwisa na konso ntangu yina!”

45 Mpe yawu yina me sala ti mu tuba yayi, mu vwandaka tuba na Mpangi Bosworth. Ntangu mu kwendaka kutala santu ya ntama yina, ntangu mu kuwaka ti yandi vwandaka kufwa, na bamvula makumi nana na ndambu, kento ya munu mpe munu kwendaka kuna. . . kuna samu na kutala yandi na ntwala yandi kufwa. Mu zolaka tuba kaka kima mosi na yandi. Mu ke zolaka kutala basantu ntangu ba ke kotaka na Nkembo, mpe mu zolaka mona yandi. Mpe beto tambwisaka tomabilu pene ya kuzikisa bapiné.

46 Kasi ntangu mu kumaka kuna, mpe mu kwendaka nswalu na kielo, tata yayi ya kiboba vwandaka me tandama kuna na nsongi. Yandi telemisaka yintu ya yandi ntangu yandi monaka munu me kwisa. Maboko ya yandi ya kiboba, ya kulemba vwandaka ya kutandama kuna, na nsuni yina vwandaka diembela. Mpe yandi tandaka maboko ya yandi na munu. Mpe mu lemukaka yandi na nkingu mpe mu bokaka, “Tata ya munu, tata ya munu, pusu ya Israel, mpe basoda ya yawu,” samu yandi vwandaka muntu ya kusantisama, muntu ya santu.

47 Mpe mu tubaka, “Mpangi Bosworth, mu ke zola kuyufula nge kima mosi. Nge ke kwikila ti nge ke kuma mbote?”

Yandi tubaka, “Oh, mu kele ve ya kubela.”

Mu tubaka, “Mbote, yinki kele diambu?”

48 Yandi tubaka, “Mu ke vutuka na Yinzo.” Yandi tubaka, “Mu me lemba, mpe mu me lemba mingi. Mpe mu ke zola kaka kuvutuka na Yinzo.”

49 Mu tubaka, “Na yina nge ke mona ti nge ke kufwa?” Mu tubaka, “Mu ke zola kuyufula nge kima mosi. Kuna na kati ya bamvula makumi sambwadi na ndambu ya ministere, wapi vwandaka ntangu ya nge ya nkembo? Nge lendaka tuba na munu, tata, mpe tuba na munu yinki nzingulu nge vwandaka na yawu, na kati ya bamvula, yina nge lenda tanga mutindu ngunga ya nge ya kulitila nene.”

50 Kana mu ke zinga tii na bamvula ya yandi, mu ke zimbana yawu ata fioti ve, mutindu meso yina ya ndombe talaka munu, na zulu ya maneti yina. Yandi tubaka, “Mpangi ya munu ya luzolo, yayi kele ntangu ya munu ya nene na luzingu ya munu. Mu ke banza ve na ntangu yina vwandaka ya nkembo mingi kulutula ntangu yayi.”

51 Mu talaka yandi na kizizi, mpe mu tubaka, “Tata, nge ke zaba ti nge ke na kufwa?”

52 Yandi tubaka, “Mpangi Branham, mu me tandama awa, mu ke na kvingila konso ntangu yina Yandi ke zibula kielo yina mpe ke kwisa, ke nata munu na Yinzho na Yandi.” Tala mutindu ya kufwa. Tala mutindu ya kukwenda.

53 Mpe mutindu beno zaba, ti, pene ya bangunga zole na ntwala yandi kufwa. . . Yandi vwandaka, me tandama na koma, kulutula bilumbu zole. Mpe ntangu yandi vutukaka na yandi mosi, yandi telemaka na kati ya kivinga, mpe yandi bandaka na kutuba na kento ya yandi. Na yina, na kintulumukina, yandi monanaka pwelele. Mpe yandi vwandaka pesa mbote, na ngunga mosi to kulutula, na bankundi ya yandi, bayina me kufwaka bamvula makumi yiya to makumi tanu, yina vwandaka bandimi na dibuundu ya yandi. Yandi pesaka mbote na mama ya yandi mpe tata ya yandi. Tii yandi vwandaka. . . ti luzingu bikaka nzutu ya yandi, yandi tululaka yintu na zulu ya kuse mpe yandi lalaka, na maboko ya Mfumu Yesu. Ya kele na kima mosi ve mutindu kusadila Yandi, kvingila Yandi.

54 Mpe mutindu mu vwandaka tuba na bakala yayi samu na yawu, mpe mu vwandaka tubila nzingulu yayi, mu tubaka yayi. Mu tubaka, “Tata, oh, ya ke vwanda nkembo ve ntangu beto ke mona Yandi? Oh, kana Yandi ke kwisa bubu yayi!”

Yandi tubaka, “Mpangi Branham, kupesa boma ve na bantu mutindu yina.”

Mu tubaka, “Yinki nge zola tuba?”

55 Yandi tubaka, “Oh, kumeka ve kutuba na bantu ti yinza ke kwisa, to Klisto ke kwisa. Ya ke pesa bawu boma.”

56 “Oh,” mu tubaka, “ve. Mu ke lomba nge pardo. Samu na bayina ke vingila Yandi, ya kele bansangu ya kulutula nkembo yina ba lendaka kuwa, ti Yesu ke zola kukwisa samu na kubaka Dibuundu ya Yandi.” Biboba ke soba na bantwenia. Kiese ke

yinga kiadi. Luzingu ke yinga lufwa. Kukondwa kufwa, ke yinga kufwa. Oh, yinki ntangu, kuzaba ti Yandi ke kwisa!

⁵⁷ Ba vwandaka vingila kumona Yandi. Ba vwandaka vingila Yandi. Mpe ntangu Yandi kwisaka, beto ke mona ti ya vwandaka na nkonga zole ya bantu. Kimvuka ya ntete vwandaka samu na Yandi, mpe kimvuka yankaka vwandaka telemina Yandi.

⁵⁸ Mpe mutindu yina beto ke mona yawu bubu yayi. Yawu yina, nkwezulu ya Yandi, ntangu nionso ke kabulaka bantu. Ntangu nionso, ntangu beno ke mona Yesu, beno ke mona na nziunga bayina ke telemina Yawu. Yina kele Satana. Mpe, bubu yayi, ntangu beto ke banza na yawu, beto ke mona ti ya me soba mingi ve. Ya kele kaka mutindu mosi. Bantu me soba, kasi mpeve ya bantu me soba ve.

⁵⁹ Na yina ntangu ba talaka na nsuka-nsuka kuna na mwelo mpe ba monaka Yandi ke kwisa, ya kumata na zulu ya mwa mbuluku yina, ya mpembe, kuyituka ve ti bilandi bandaka na ku—kuboka, “Kimfumu ya Mazulu me kwisa!” Bantu vwandaka kwenda mbangu samu na kukutana na Yandi, mpe Jérusalem nionso vwandaka ya kuningana. Ya kele na kima mosi samu na yawu, ntangu Yesu ke kwisaka, ya ke ningisaka ntangu nionso. Mpe mbanza ya muvimba vwandaka ya kuningana. Mpe ba—ba lendaka bumba yawu ve.

⁶⁰ Mpe balongi ya ntangu yina tubilaka kuningana yina, samu ya vwandaka feti ya paki. Mpe ba bokaka, “Nani kele Muntu Yayi?” ntangu mupepe vwandaka ya kufuluka, mpe nkwezulu ya Mfumu Yesu, na Jérusalem, vwandaka me fulusa mupepe na kulingilaka, ya ke monana ti balongi zolaka zaba yina zolaka salama. Ya monanaka ti nganga-Nzambi ya mbuta zolaka zaba yawu. Ya monakaka ti banganga-Nzambi yankaka nionso zolaka zaba yawu.

⁶¹ Mpe ya me soba ve, bubu yayi, samu Mpeve-Santu ke zabisa na ntuala Nkwezulu ya Mfumu Yesu. Mpe mutindu Mpeve-Santu ke banda na kumwangana na zulu ya ntoto, batiya ya reveil ke sema, bisika nionso, bidimbu ya nene mpe mambu ya ngitukulu me salama, bakubeluka ya nzutu me salama, ba-profesi me pesama. Balusakumunu nionso ya bantumwa me vutuka diaka na Dibundu. Na yina, mutindu ya vwandaka na ntangu yina, mutindu mosi ya kele ntangu yayi, mpeve ya muntu ya kukondwa lukwikilu ke boka kaka, “Nani kele Muntu Yayi?”

⁶² Bayankaka na kati ya bawu kwikilaka na Mfumu Yesu, samu na kutuba Yandi vwandaka Muntu ya mbote. Bayankaka kati ya bawu tubaka, “Yandi kele Muntu ya mbote.”

⁶³ Yawu yina ba ke tuba bubu yayi. Ba ke meka na kutula Yandi mutindu Napoléon, kinwani. Ba ke meka na kutula Yandi mutindu George Washington, muntu ya kieleka. Kasi Yandi vwandaka kulutula yina.

64 Beno me landa ntangulu ya Masonuku? Ba tubaka, “Yayi kele Profete yina me katuka na Galilée.”

65 Mpe ba ke meka na kutuba diambu mosi bubu yayi, ntangu ba ke mona kuningana yayi ya nene ya Mfumu: kuvutuka, na mavimpi, ya bambevo mpe bantu ya mpasi; kumona Yandi ke sadila Mpeve ya Yandi na kati ya Dibuundu ya Yandi, samu na kuswasikisa mabanza ya bantu; kumona Yandi ke sala kaka mutindu Yandi salaka ntangu Yandi vwandaka awa na zulu ya ntoto, samu na kulungisa yina Yandi tubaka ke salama; ya kieleka, mabuundu mpe bantu, vwandaka yufula, “Nani kele Muntu Yayi?”

66 Ba bakulaka ve nani Yesu vwandaka, samu ata muntu mosi ve na kati ya bawu lendaka zaba Yandi, na nzila ya balukolo ya bawu. “Wapi seminere Yandi me katuka? Wapi lukolo ya théologie Yandi me katuka?”

67 Mpe mutindu yina ya kele bubu yayi. Mingi ya bantu yina vwandaka ya kupakulama na Mpeve-Santu katukaka ve na seminere. Ba kele mbuma ya nsodolo ya yandi mosi Nzambi. Kasi bidimbu mpe bimangu, mpe mambu ya ngitukulu yina ba silaka na kati ya Biblia, ke tambula kintwadi na Mpeve-Santu yayi ya nene mutindu Ya ke sala na kati ya bantu.

68 Mpe ba ke tuba bubu yayi, “Wapi lukolo ba me katuka?” Kaka na ntangu beno ke kota na mbanza mosi, samu na kuvwanda na reveil mosi, “Wapi denomination beno kele?”

69 Mu vwandaka na masolo na Kilumbu ya tanu na manima ya midi, na nganga-Nzambi ya Catholique Romaine yina me katuka na dibuundu ya Irland na Louisville. Mpe kaka na ntangu ba talisaka munu na yandi, muntu ya nene ya mayele, yandi tubaka, “Tata Branham, wapi kele denomination ya nge?”

Mu tubaka, “Mu kele na mosi ve.”

Mpe yandi tubaka, na yina, “Ba me biekaka nge?”

Mu tubaka, “Yinga, tata.”

Yandi tubaka, “Nani biekaka nge?”

70 Mu tubaka, “Mfumu Yesu pesaka munu Mpeve-Santu, samu na kulonga Nsangu ya mbote, mpe pesaka munu lutumu.” Mbote, tala mbiekolo yina beto ke na yawu nsatu.

71 Yesu tubaka ata fioti ve na bilandi ya Yandi, “Benno kwenda na . . .” Mu ke vweza ve bima yina, kasi ba sadilaka kilumbu ya bawu. Yandi tubaka ve, “Benno kwenda, longuka, bamvula *mingi* samu na kuvwanda longi.”

72 Yandi tubaka, “Benno bikala na mbanza ya Jérusalem, tii kuna beno ke fuluka na Ngolo ya Mazulu.” Yandi tubaka na bantu yina lendaka ve kusonika nkumbu ya bawu mosi. “Mpe na manima ya yayi, Mpeve-Santu ke kwisa na zulu ya beno, na yina

beno ke vwanda bambangi ya Munu, na Jérusalem, na Judée, na Samarie, mpe na bansuka ya ntoto.” Yawu yina mbiekolo.

⁷³ Beto kele na ata kisika mosi ve ya me tuba ti Yesu kwendaka na, to Yandi kuzwaka diplome ya seminere mosi. Kasi, ya vwandaka na ba-seminere mingi yina tungamaka na Nkumbu ya Yandi, samu na mambu ya nsambulu, ti ya vwandaka ve samu na kima yankaka—kima yankaka yina me vwandaka ntete ve na yinza. Beto ke na kisika mosi ve—mosi ve ti Yandi kwendaka na lukolo. Kasi, diaka, ya kele na balukolo yina tungamaka na Nkumbu ya Yandi kulutula nkumbu yankaka nionso na nsi ya mazulu, balukolo. Beto me kuwaka ata fioti ve Yandi sonikaka buku mosi. Kasi, ya kele na babuku mingi ba me sonikaka samu na Yandi kulutula samu na kima yankaka nionso ba ke tubila na masonama. Mpe, bubu yayi, Biblia ya Yandi kele Buku yina me zabana mingi na yinza ya muvimba, na kati ya masonama nionso.

⁷⁴ Kasi, beno me mona, na kilumbu ya kotalana, ba bokaka, “Nani Yandi kele?”

⁷⁵ Beno me mona, Nzambi ke bakaka kima yina ke monana ya kukondwa mfunu, samu na kubasisa kima mosi na yawu. Beno tala yina ke salaka Yandi Nzambi.

⁷⁶ Mpe Ntangu ba monaka Yandi, ke kota na mwelo yina, bayankaka kati ya bawu tubaka, “Yandi kele Muntu ya nene.”

⁷⁷ Ba ke tuba yawu bubu yayi. Ya kele na balukolo ya théologie yina ke longi, bubu yayi, ti Yesu vwandaka Muntu ya nene, ti Yandi vwandaka Muntu ya mbote. Bayankaka na kati ya bawu mpe tubaka ti Yandi vwandaka profete. Ntangu yayi, kana Yandi vwandaka kaka profete, to Muntu ya mbote, beto ke vwanda na masumu ya beto. Yandi vwandaka kulutula profete. Yandi vwandaka kulutula Muntu ya mbote. Kasi, Yandi vwandaka Muntu ya mbote. Kasi, Yandi vwandaka Profete-Nzambi. Kasi Yandi vwandaka kulutula yina. Yandi vwandaka Nzambi me monisama kati ya nzutu, samu na kukatula disumu.

⁷⁸ Mpe mutindu Yandi vwandaka kwisa, na zulu ya mbulukulu, bantu mingi vwandaka tuba, “Yandi kele munganga. Oh, beto monaka Yandi ke zibula meso ya bampofu. Beto monaka Yandi ke sala ti bikata kutambula. Beto monaka Yandi ke sambila, mpe fièvre me bika mwana.” Kasi, na yina, nkonga ya bantu yina vwandaka kaka kulanda Yandi samu na mampa mpe bambisi.

⁷⁹ Mpe mutindu yina nkonga ya bantu mingi, kele bubu yayi. Kana Yandi kwisa mutindu munganga, na yina, ba—ba ke landa Yandi, mpe Yandi kele kaka—Yandi kele kaka oasis. Kana ba me bela, ba ke kwenda mbangu, ba ke tuba, “Oh, nge ke zola kusambila samu na munu, ti Mfumu Yesu kubelusa munu?” Mpe kaka na ntangu ba ke basika na lupitalu, to na mbeto ya lupitalu, mbala mosi ba ke vutuka na yinza, mutindu yimbwa ke vutuka na yina ya lukaka, to ngulu ke vutuka na poto-poto, mutindu

Masonuku me tuba. Ba ke landa Yandi kaka samu na mambote yina ba lenda kuzwa na Yandi. Ba ke sadila Yandi kaka mutindu dikunzi mosi ya kiteki, to—to kima yina—yina ba lendaka kuzwa na Yandi, mpe ba ke zola ve kusadila Yandi. Nkonga ya bantu yina kele kaka bubu yayi.

⁸⁰ Ya vwandaka na bantu yivwa ya kimbevo ya wazi yina belukaka, mpe mosi vutukaka samu na kuvutula na Yandi matondo. To ya vwandaka kumi? Bawu, mosi na kati ya bawu, vutukaka samu na kuvutula na Yandi matondo, mpe bayankaka na kati ya bawu kwendaka nzila ya bawu, kukondwa kuvutula matondo.

⁸¹ Mpe kana bantu ya Amerique, yina me belukaka na Ngolo ya Nzambi, ke vutula bantima ya bawu na Nzambi, ya ke vwanda na reveil mosi ke ningisa yinsi yayi mpe ke kanga bisika nionso ba ke tekaka malafu, ti . . . Bamagazini ya malafu mpe bamagazini ya wiski ke vwanda diaka ve. Mabuundu ke fuluka. Bayinzo ya cinéma ke vwanda ya mpamba na Lumingu na nkokila. Mpe reveil mosi ke banda, na yinsi yayi. Kasi ntangu ba ke mona yawu ke salama, bima yina Nzambi ke sala, ba ke landila na kuboka, “Nani Yandi kele? nani kele muntu yayi ke kwisa? Wapi ba me katuka? Nani kele muntu yayi? Wapi ke katuka kiyeka yina yandi ke sala yawu?”

⁸² Mu ke zimbana ata fioti ve, na Johannesburg, na Afrique du Sud. Mu vwandaka me kuma kaka, na avion, pene ya minuti makumi tatu na ntwala. Mu salaka bilumbu tatu mpe bampimpa tatu na mipepe, na yina mu lembaka mingi ti mu lendaka telama ve. Ba—ba nataka munu na kilanga mosi ya foire kisika bantu mafunda makumi tanu to makumi sambanu vwandaka me vukana. Mpe kaka na ntangu mu mataka na estrade, ti Mpeve-Santu. . . Mu monaka, bus mosi, ke zengisa kisika mosi. Mpe ya vwandaka na kidimbu mosi na zulu ya yawu, “Durban.” Mu monaka bakala mosi ya ntwenia yina vwandaka nwana samu na kutina tata mpe mama ya yandi, na dikulu mosi vwandaka ya nkufi na ba-centimètre kumi na tanu to ba-centimètre makumi zole kulutula yankaka. Yandi vwandaka me lwata simisi ya mpembe, ya vwandaka na ba-bretelle yina vwandaka simba pantalon ya yandi. Mpe mu vwandaka tala bakala yayi ya ntwenia. Mu talaka diaka na manima. Vision kwendaka. Na manima, kaka na mwa ntangu fioti, mu monaka Nsemo yina na zulu ya bakala mosi ya ntwenia, kuna na manima ya nkonga ya bantu. Mpe mu talaka. Mu banzaka, “Mu me mona yandi kisika mosi kuna.” Mu talaka yandi, mpe Nsemo yina telemaka kaka na zulu ya yandi na mwa ntangu fioti. Mpe mu vwandaka vingila mutendudi samu na kusimba bampova yina ke landa. Na yina mu monaka ti bakala yina ya ntwenia telemaka, yandi losaka ba-bequille ya yandi, mpe dikulu ya yandi ya nkufi ya ba-centrimètre kumi kulaka mpe kumaka yinda mutindu yankaka yina.

⁸³ Mpe mu tubaka na Tata A. J. Schoeman; yina kele na Nkembo, na nkokila yayi. Mu tubaka, “Tata Schoeman, vutukila bandinga ya munu. Ya kele vision.”

Yandi tubaka, “Mbote mingi.”

⁸⁴ Mpe mu tubaka, “Bakala ya ntwenia yina me vwanda kuna na manima yina me lwata simisi ya mpembe, mpe ba-bretelle, yandi me katuka na mbanza yina ba ke bokilaka Durban, pene ya ba-kilomètre mafunda zole na nkama tanu na yayi, na bus. Mpe yandi tinaka tata mpe mama ya yandi, samu na kukwisa. Kasi yandi me kwikila na Mfumu Yesu, mpe yandi kele na dikulu mosi ya nkufi ya ba-centimètre kumi na tanu kulutila yina yankaka.”

⁸⁵ Mpe bakala yango ya ntwenia telemaka. Yandi vwandaka kuna, me telama, yandi vwandaka meka na kubaka ba-béquille ya yandi. Mpe mu tubaka, “Ntwenia ya bakala, Mfumu Yesu me belusa nge.” Mpe na mbala mosi dikulu ya yandi kumaka yinda ya ba-centimètre kumi na tanu, ya kumaka mbote, mutindu mosi na yankaka. Mpe ba nataka bakala yango ya ntwenia na estrade, mpe badokotolo talaka yandi mbote-mbote kuna. Beno tala kizizi ya yandi na buku ya munu.

⁸⁶ Mu vwandaka ya kutelama kuna kaka na mwa ntangu fioti, mu monaka mwa tomabilu mosi ya fioti, ya vert yina vwandaka tambula na nzila, mpe ya telumukaka. Ya balukaka, na ndambu yankaka, mpe tutaka yinti mosi. Mwana-kento mosi ya ntwenia, na bansuki ya mbwaki vwandaka . . . bukanaka mukongo. Mpe mu tubaka, “Mu ke mona mwa tomabilu mosi, ya vert yina me telumuka mpe me tuta yinti mosi, mpe mwana-kento mosi pene ya bamvula kumi na nana me bukana mukongo. Yandi kele na mpasi ya nene.” Ata muntu mosi ve pesaka mvutu. Mpe mu lendaka ve kumona yandi na kati ya nkonga ya nene, ya bantu mingi. Mpe mu telemaka kuna na mwa ntangu fioti. Mu tubaka, “Beno bakula. Ya kele . . . Beno vwanda na boma ve. Ya kele Mfumu Yesu, na Ngolo ya mvumbukulu. Yandi fidisaka Mpeve-Santu samu na kulandila kosalu ya Yandi.” Mpe kuna mu monaka vision kwisaka diaka. Mpe mu lendaka ve kumona kento yango ya ntwenia.

⁸⁷ Kaka na ntangu yina, kaka na ntwala ya munu, vwandaka Nsemo yina, mutindu beno ke mona yawu na kizizi. Mpe Ya vwandaka me telama kuna. Mu kwendaka kuna, mpe yandi vwandaka me tandama kuna, na yisi ya estrade. Mu tubaka, “Mama ya ntwenia, Mfumu Yesu me belusa nge.” Mpe yandi bandaka na kudila.

⁸⁸ Mama ya yandi tubaka, “Oh, ve! Kutuba na yandi ve ti yandi telama!” Yandi tubaka, “Kana yandi telama, yandi ke kufwa.”

⁸⁹ Mpe mama yango ya ntwenia telemaka, yandi bandaka na kuboka, mpe kukumisaka Nzambi. Mpe mama kangamaka mpe yandi kubwaka na mbeto ya bambevo kisika mwana-kento yango vwandaka me tandama.

Yinki ya kele?

⁹⁰ Kaka pene ya ntangu yina, bakala mosi ya masawula telemaka kuna na manima, mpe yandi tulaka dikulu mosi na zulu ya kiti mosi, mpe na zulu ya kiti yina yankaka, mpe tubaka, “Beno, ba-Américain! Mu ke tula ntembe na beno na kutuba na munu na Nkumbu ya nani beno ke sala yawu! Mpe wapi kele denomination ya dibuundu ya beno?” Beno me mona?

⁹¹ Ya kele kaka mutindu mosi. Ba ke bakula ve. Ba ke vingila bima yayi ve. Mabuundu ke vingila ve Nkwizulu ya Mfumu. Mpe Mpeve-Santu kele awa samu na kusiamisa Nkwizulu ya Yandi, samu na kulungisa Yawu. Na yina . . .

Bawu nionso ke zola kulanda nzila ya yandi. Ya ke mutindu yina ya vwandaka kuna. Konso kimvuka vwandaka na dibanza ya bawu mosi.

⁹² Kasi kuna ya kele ve diambu yina na nkokila yayi. Yawu yina ve mu ke tubila. Kasi diambu mu ke tubila beno, kele, yinki beno ke banza Yawu kele? Ya me tala beno. Nani Yayi ke sala nzietolo na bayinsi? Ya kele bantu ve. Bantu lenda ve kusala bima yayi. Nani Yayi ke tuba mpe ke zonga na bantu na kati ya kivinga, mutindu, “Ya me vwanda kaka *awa*, na lweka yina *kuna*,” mpe bisika ya luswaswanu na kati ya lukutakanu, ntangu bakento mpe babakala ba me nata bawu awa, ke na kufwa? Nani Ya kele?

⁹³ Kento yayi ya ntwenia yina me kota na baptistère na suka yayi, ti basabala tatu me luta, vwanda kufwa na cancer carcinomateux, yandi ke zingaka kaka awa na Bala-bala na Maple, Mama Baity. Mpe mu yufulaka badokotolo tatu yina vwandaka na yandi. Yandi vwandaka na siansi ve ya kuzinga, na bana ya fioti yiya to tanu, mpe mama ya munu vwandaka meka na kukeba bawu. Mama tubaka, “Bill, yandi ke vutuka ata fioti ve na yinzo.”

⁹⁴ Mpe mu kwendaka kisika yandi vwandaka, mpe Mfumu Yesu tubaka, “MUTINDU ME TUBA MFUMU, kana yandi kwenda na yinzo-Nzambi mpe yandi sala nsilulu ya kubaka mbotika na Nkumbu ya Mfumu Yesu, mpe ke sadila Nzambi, yandi ke vutuka na yinzo, ya kubeluka.”

Mpe mu yufulaka yandi, “Nge ke sala yawu, mama?”

⁹⁵ Mpe yandi tubaka, “Nionso yina nge ke tuba, mu ke sala yawu.” Na mbala mosi bampasi zimbanaka. Bilumbu tatu na manima, yandi vutukaka na yinzo, mpe badokotolo lendaka ve kumona ata kidimbu ya cancer yina.

⁹⁶ Nani kele Muntu Yayi ke kwisa na Nkumbu ya Mfumu? Nani Ya kele? Ya kele Mpeve-Santu ya Nzambi. Yinki kele dibanza ya beno samu na Yawu? Yinki kele dibanza ya beno, beno yina me zaba pasteur ya beno? Mpe ya kele na bantu yina me vwanda awa, bantu yina me katuka na nganda ya mbanza, ba me vwanda kuna na épilepsie, ba me vwanda na . . .Tala bakala mosi me

vwanda awa, kisika mosi na kati awa, mpangi-bakala mosi ya Mennoinite, kaka awa, yandi vwandaka na mpasi ya épilepsie. Mu me zaba yandi ata fioti ve to mu me monaka yandi ve, mu me zaba kima mosi ve samu na yandi. Mpe na mbala mosi, pene ya bamvula zole me luta, mu banza, to kima mosi, yinga, bamvula zole, Mpeve-Santu me tuba yawu, mpe tubaka “MUTINDU ME TUBA MFUMU.” Kubanda ntangu yina yandi ke kubwaka diaka ve. Nani Ya kele? Nani Ya kele?

⁹⁷ Kento yayi vwandaka ya kuvwanda awa, na Lumingu me luta, na ntangu yina mu vwandaka awa, yandi katukaka kisika mosi kuna na Illinois. Kilumbu yina landaka...Na tumeur ya nene na nzutu ya yandi, yina vwandaka na mayela. Mpe baminganga yankaka ya kulutila mbote ya Illinois zolaka nata yandi na lupitalu ya nene, samu na kupasula yandi, na Kilumbu ya ntete. Mpe yandi kuzwaka ntangu ya kukota na lukutakanu. Mu me monaka yandi ata fioti ve to mu me kuwaka yandi ve, na luzingu ya munu ya muvimba. Mpe na mbala mosi, Mpeve-Santu fukaka yandi, mpe Yandi tubaka na yandi nani yandi vwandaka, wapi kisika yandi me katuka, mpe ba zolaka pasula yandi na kilumbu yina landaka. Bantu yikwa vwandaka awa na ntangu yina, samu na kumona yawu? Mpe beto monaka nsangu me panzana na zulunale. Kilumbu yina landaka, ntangu yandi kwendaka na dokotolo, ba nataka yandi na lupitalu mosi na yankaka, mpe ba lendaka ve kumona ata kidimbu ya yawu.

⁹⁸ Nani kele Muntu Yayi? Oh, Nzambi kuwa mawa! Nani kele Muntu Yayi ke sala yayi? Beno lendaka meka na kutuba ti ya vwandaka pasteur ya beno? Ata fioti ve. Beno lendaka meka na kutuba ti bantu ke na kusalu ya kusala na yawu? Ata fioti ve. Ya kele Mpeve-Santu, Mpeve yina vwandaka na Mfumu ya beto Yesu. Mpe Nkwizulu ya Yandi ke vukisa Yandi na Dibuundu ya Yandi, ya kele pene-pene mingi ti Yandi ke na kumwangisa Nsemo ya Yandi ya nene ya santu, samu na kuvuukisa, mpe kuvutula na ngwisani Dibuundu ya Nzambi ya moyo, samu na Enlevement yina me kuma pene-pene. Amen!

⁹⁹ Nani Ya kele? Mu lenda ve kuvutula mvutu na kiuvu ya beno. Mu lenda ve kuvutula mvutu na kisika ya beno. Kasi mu lenda pesa beno mvutu. Mpe na ntwala ya chaire yayi ya santu, na nkokila yayi, na ntwala ya nkonga, ya bantu yayi, mpe—mpe yina ba me futa na Menga ya Mfumu ya beto Yesu, mu ke tuba yayi na kati ya ntima ya munu. Ya kele ve samu ti mu kele mosi na kati ya beno, ya kele ve samu ti mu kele kaka muntu mosi ya luswaswanu, kasi mutindu mosi ya bayina ba me vuukisa yina ba me sukula na Menga. Mu ke kwikila ti Nsemo yina mosi kele na zulu ya dibuundu yayi, na nkokila yayi, Yawu mosi ke talisa, na nkadulu ya Yawu, ti Ya kele Yesu Klisto, na mutindu ya Mpeve-Santu.

¹⁰⁰ Muntu nionso yina me zaba Masonuku, me zaba ti Yesu tubaka, “Mu me katuka na Nzambi, mpe Mu ke kwenda

na Nzambi.” Na ntwala Yandi kukuma Nzutu, ntangu Yandi vwandaka na Moise na ntoto ya kuyuma, Yandi vwandaka Dikunzi ya Tiya. Mpe ntangu Moise zolaka kumona Yandi, Yandi lutaka mpe Moise monaka mukongo ya Yandi. Mpe Moise tubaka, “Ya ke monana mutindu Muntu.” Ntangu Yandi vwandaka awa na zulu ya ntoto, Yandi vwandaka Muntu. Yandi salaka kieleka bima mosi yina Yandi ke na kusala, bubu yayi, na kati ya bantu yina Yandi me vuukisa. Yandi kwisaka kuna mpe Yandi ke baka foto. Yinki ya kele?

¹⁰¹ Na manima ya lufwa ya Yandi, luzikulu mpe mvumbukulu, Paul vwandaka na nzila samu na kukwenda na Damas, kilumbu mosi, mpe Nsemu mosi ya nene bwisaka yandi na ntoto. Bantu yina vwandaka na yandi monaka ve Nsemu yango. Kasi Ya bwisaka Paul na ntoto, ti Ya kumisaka yandi mpofo. Yandi kuzwaka mpasi na meso ya yandi luzingu ya yandi ya muvimba. Mpe yandi tubaka na ntangu mosi, “Samu ti mu vwanda ve na lunangu samu na luzayikisu ya kulunga, ba me pesa munu yawu,” mwa nkunki na kati ya nzutu, munati nsangu mosi ya Satana, samu na kubula yandi. Samu ti ya vwandaka luzayikisu ya kulunga.

¹⁰² Mpe ntangu ba bwisaka Paul na ntoto, ntangu ya vwandaka na nzila samu na kuniongisa bantu yina vwandaka sala makelele mingi; kimvuka yina me butuka mbala ya zole, bantu yina ba bokilaka ba-eretiki. Paul vwandaka kwenda samu na kotalisa bantu yina mpasi, yandi vwandaka na mikanda na pokosi ya yandi, samu na kukanga bawu mpe kunata bawu na Jérusalem. Mpe na kati-kati ya kilumbu, kuna kulumukaka Nsemu mosi, yina bwisaka yandi, na ntoto, mpe yandi kubwaka na putulu ya ntoto. Kuna basikaka Ndinga mosi na Nsemu yina, na kutubaka, “Saul, Saul, samu na yinki nge ke kotalisa Munu mpasi?”

¹⁰³ Mpe Saul balukaka, na kitezo ya yandi ya kimpofo, yandi talaka na zulu. Mpe yandi lendaka ve kutala Nsemu yina ya nene, ya nkembo. Mpe yandi tubaka, “Mfumu, Nani Nge kele?”

¹⁰⁴ Yandi tubaka, “Mu kele Yesu. Mu me katuka na Nzambi; Mu kwendaka na Nzambi. Mu me katuka na Nzambi; Mu ke vutuka na Nzambi.” Yandi tubaka, “Nge ke tala mpasi mpamba mutindu ngombe yina ke na kunwana na yinti ya nsongi ya mfumu ya yandi.”

¹⁰⁵ Luzayikisu yina ya kuzwaka na kisika yayi ya santu, na ntangu me luta na kisika yayi, mpe muntu lenda ata fioti ve kuvwanda mutindu mosi. Muntu, ntete yandi kukibokila yandi mosi Muklisto, ntete yandi lenda kukitalisa yandi mosi, yandi fwana ntete vwanda na nzingulu yina na manima ya ntoto ya kuyuma, kisika yandi me kutana na Nzambi, mbunzu na mbunzu.

¹⁰⁶ Na yina, bubu yayi, beno lenda vwanda na konso mutindu ya mvutu. Beno lenda mona Mfumu ke lungisa kaka ya kieleka

yina Yandi tubaka Yandi ke sala, mpe ba-théologien ya mayele mingi ke tendula Yawu na mutindu ya kuswaswana. Ba ke tuba, “Yina vwandaka samu na kilumbu yankaka. Ya vwandaka samu na *yayi*. To, Ya kele samu na nsungi yankaka. To, Ya kele luvunu.” Mutindu ba tubaka samu na Yesu, “Yandi kele Béelzébul, diabulu. Yandi kele nganga-nkisi.” Mpe bima yina nionso, bawu kele na mvutu.

¹⁰⁷ Kasi ntangu muntu mosi me kutana ve na Klisto, mpe me mona Yandi mutindu Paul monaka Yandi, to salaka nzingulu na Yandi, ya kele ve na ba-théologien mingi na yinza yina kele na kiyeka na bantendulu ya bawu na kunaka muntu yina na kumanga nzingulu yayi.

¹⁰⁸ Yawu yina, bubu yayi, bawu kele na nzingulu ve. Yawu yina ba lendaka tuba ve. . . bawu nionso ke tuba, “Nani kele Muntu Yayi? Yinki Yayi? Wapi kisika Yawu me katuka?” Ba kele ve na mvutu. Samu na yinki? Samu, nionso ba me zaba kele théologie yina mabuundu mingi me sala. Kele ve “kuzaba théologie” kele Luzingu. Kele ve “kuzaba Biblia” kele Luzingu.

¹⁰⁹ Kasi “kuzaba Yandi” kele Luzingu. “Kuzaba Yandi” mutindu Mvulusi ya beno mosi, mutindu Muntu Yina me fulusa beno na Mvwandulu ya Yandi. Beno vwandaka kuna ntangu ya salamaka. Ya ke na muntu mosi ve lendaka katula beno Yawu. Ya ke na muntu mosi ve na bantendulu ya yandi lendaka nata beno na kumanga Yawu. Ntangu nzingulu yina ke salama na beno, beno ke zaba Nani Yandi kele. Samu na munu, Yandi kele Yesu Klisto mutindu mosi mazono, bubu yayi, mpe kukonda nsuka.

¹¹⁰ Nani yayi ke na kusalaka bimangu yayi? Nani yayi ke na kusalaka bisalu yayi ya nene? Ya kele longi? Ya kele Oral Roberts? Ya kele Billy Graham? Ya kele Kack Schuler? William Branham? Konso muntu yina ya lendaka vwanda, ba ke na kima ya kusala ve na yawu. Ba kele bisadilu.

¹¹¹ Ya kele Mpeve-Santu ke kwisa na Nsangu ya mbote, na bidimbu mpe mambu ya ngitukulu mpe bimangu, samu na kukubika bantu. Mipepe ke ya kufuluka na kuingila, na bakwikidi ke vingila Yandi kwisa.

¹¹² Mpe bayankaka ke tuba, “Samu na yinki ba-reveil yayi? Samu na yinki beto ke na yawu? Beto sepela kaka na yinzo-Nzambi.” Samu na yinki, ya me tubama ti na kati ya yinzo-Nzambi awa, ti, ntangu beto bandaka kutunga yinzo-Nzambi ya malu-malu, bantu vwandaka tuba, “Beto ke na nsatu ya bimangu ve. Beto ke na nsatu ya bima yayi diaka ve. Kana beno ke na nsatu ya yawu, beno kwenda na kilanga ya kumwangisa nsangu kisika ya ke salama. Beto ke na nsatu ya yawu ve awa.” Ntangu Branham Tabernacle ke kubwa na nsi mingi, ya ke vwanda nsuka samu na yawu.

¹¹³ Yinzo-Nzambi yayi me tungama na zulu ya misiku mpe Ngolo mpe Nsangu ya mbote ya Yesu Klisto. Mpe ntangu nionso

tabernacle yayi ke vwanda, bika ti Mpeve-Santu ya nkembo kukota na mioyo, samu na kuvulusa, mpe kufulusa na Mpeve-Santu, mpe kubelula bambevo. Samu na munu, Yawu keke Yesu Klisto mutindu mosi mazono, bubu yayi, mpe kukonda nsuka.

Beto sambila.

¹¹⁴ Kana beno me zaba ve Nani Yandi keke, beno ke zaba ve yina nionso yayi keke, mpe beno zola kuzaba, beno zola kaka kutelemisa diboko ya beno na zulu? Mpe beno telemisa diboko ya beno, samu na kutuba, “Sambila samu na munu, Mpangi Branham, ti mu kuzaba Yandi.” Mpe Mfumu kusakumuna beno. Mpe bisika nionso, mu ke mona maboko ya beno.

¹¹⁵ Ntangu yayi, Tata ya Mazulu, beto ke nata Nsangu yayi, mpe bambuma ya bantu na kutelemisaka maboko ya bawu, ti bawu zola zaba Nani Muntu Yayi keke. Bawu zola zaba Yesu yayi ya nene. Ti, Nkwizulu ya Yandi, ya mvumbukulu, me kuma pene-pene, ti bambevo me banda na kubeluka. Mpe na manima yina me salama, na yina profesi me kwisa na Dibuundu, na manima makabu mpe bimangu, ntangu yayi ya me landila tii na kidimbu ya nsuka. Yina ke landa ke kwisa, Enlevement, ba ke baka Dibuundu. Mpe beto, Mfumu, yina me lomba samu na kuzaba Nge na kati ya Ngolo ya mvumbukulu ya Nge, beto ke vingila, mpe beto ke vingila na ntima ya tiya-tiya, mpe beto ke lomba, mpe beto ke dodokila, “Kwisa, Mfumu Yesu!”

¹¹⁶ Zangula Dibuundu ya Nge mpe nata Yawu, nswalu, Mfumu. Samu ti, ntama mingi ve, bantu ke mwanga ntoto yayi Nge vangaka samu na bawu na kuzinga, samu bawu me tumama ve na Nge. Bawu me longuka ngemba ve, kasi mvita. Bawu me longuka ve kieleka, kasi bawu me longuka ya mayele ya yimbi. Wapi mutindu ti bawu nionso ve ke vwanda na nsatu ya lutumu! Mfumu, mwa ditono yina na ntima ya bawu yina ke sala ti bawu kuvwanda na mpwila ya ngolo, ba ke meka na kusepelisa yawu na laboratoire mosi kuna, samu na kumwanga bampangi ya bawu.

¹¹⁷ Nzambi, kana ba lendaka kaka kuzaba ti ngolo yina ba ke sosa mingi keke Ngolo ya mvumbukulu ya Mwana ya Nzambi, Ngolo ya Mpeve-Santu samu na kusoba baluzingu ya bawu; ya keke ve samu na kumwanga bayinsi, kasi samu na kusoba baluzingu ya bawu mpe kusala bawu bisadi ya Nge.

¹¹⁸ Bantu mingi, yina me natama na bulawu, ba ke bokila beto nkonga ya “bantu yina me zaba kima mosi ve,” mpe—mpe mutindu “ba-eretiki,” mutindu ba salaka na mbandukulu. Kasi mutindu ba vwandaka vutuka, na kusepela, na kutondaka Nge ti ba lendaka ndima na kulwata nsoni ya Nkumbu ya Nge. Yawu yina keke nsatu ya bana ya Nge, na nkokila yayi, Mfumu, bisika nionso. Beto keke kaka na kiese.

¹¹⁹ Bayankaka na kilumbu ya Nge mekaka na kutalisa Nge. Ba tubaka, “Yandi keke nkundi ya muntu yina ya mpamba-mpamba,

Jean, yina me katuka na ntoto ya kuyuma yina me lwata ve bilele ya kitoko, yina me lwata kaka mwa mpusu ya ntama ya dimeme. Muntu ya mpamba-mpamba yina vwandaka losa bampova, kisaka-saka, mpe yandi tubaka, ‘Disoka me vwanda na nsimbulu ya yinti.’” Yandi tubaka, “Yandi kele kilandi ya yandi. Yandi kele muntu ya mpamba-mpamba. Yandi kele kilawu. Yandi zaba ve yina Yandi ke tuba.” Ministere ya mazulu Nge vwandaka na yawu, O Mfumu, kufwaka meso ya bantu yina.

¹²⁰ Mpe mutindu mosi ya kele diaka bubu yayi: Mpeve-Santu yayi ya nene ke zabisa na ntwala Nkwizulu ya Mfumu, mutindu Jean salaka na kilumbu ya yandi, ke kufwa meso ya bantu, ya bayina ke zola ve kumona. Kasi na bayina ke zola kumona, Nge me solaka bawu. “Mpe bayina nionso Tata pesaka Munu ke kwisa na Munu,” Nge tubaka, “mpe ata mosi ve kati ya bawu ke zimbana. Mpe Mu ke vumbula yandi na kilumbu ya nsuka.” Beto ke tonda Nge samu na yawu.

¹²¹ Mpe na bayina me telemisa maboko ya bawu na zulu, na nkokila yayi, beto ke sambila, O Mfumu Nzambi, ti Nge ke kutalisa Nge mosi na bawu, na kati ya nzingulu, na kati ya Ngolo ya mvumbukulu. Pesa yawu, Mfumu.

¹²² Mpe bayankaka lendaka vwanda awa, yina me telamisa ve maboko ya bawu, kasi kuna, na kati ya ntima ya bawu, ba me zaba ti ba ke na nsatu ya yawu. Mu ke sambila ti Nge sakumuna bawu, mpe pesa bawu nsatu ya ntima ya bawu.

¹²³ Ntangu beto ke bika kivinga yayi, na nkokila yayi, bika ti beto kwenda mutindu bantu ya luswaswanu. Bika ti beto kwenda na lukanu ya luswaswanu kulutila yina beto vwandaka na yawu, na kukota, kana ya vwandaka ya kuswaswana na luzolo ya Nge ya Kinzambi. Bika ti beto kwenda na dikani ya kusimba bibongo ya autel, tii moyo ya beto ke sepela ti beto me kuzwa nzingulu na Nge, mpe beto zaba Nani beto ke tubila, samu beto me kutana na Yandi mpe me zaba Yandi, mpe beto kele na ngwisani na Yandi. Pesa bima yayi, Tata. Belula bambevo mpe bantu ya mpasi.

¹²⁴ Sakumuna pasteur ya beto ya luzolo mpe ya ntalu. Nzambi, beto ke sambila ti Nge ke vwanda na yandi mpe bampangi ya yandi ya luzolo ya bakento, na yina bawu ke yimbaka Nsangu ya mbote, mpe ke longaka Yawu na radio.

¹²⁵ Sakumuna banzenza yina kele na kati ya beto. Mfumu, bika ti bawu basika, na nkokila yayi, na kizitu na ntima ya bawu, mpe lukanu mosi ti bawu, kubanda na ngunga yayi, kana ba me zaba Nge ve mpe sadilaka Nge ve, na ntwala, bika bawu sadila Nge. Na kuzabaka yayi, ti, “Bima yankaka nionso ke kufwa kimakulu, kasi Ndinga ya Mfumu ke vwanda kukonda nsuka.” Pesa yawu, Tata.

126 Lemvokila beto, masumu ya beto nionso. Mpe bika beto kukutana na yina ya nene... [Kisika ya mpamba na bande—Mu.]

Samu Yandi zolaka munu ntete
Mpe futaka mpulusu ya munu
Na yinti ya Calvaire.

127 Ntangu yayi, na manima ya Nsangu, beto kulumusa kaka bayintu ya beto mpe beto sambila Yandi, mutindu beto ke yimbila Yandi.

Mu zola Yandi,
Na ntima ya beno nionso.

Mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

128 Bantu yikwa ya kieleka zola Yandi? Beno telemisa maboko ya beno, beno tuba yayi mutindu kimbangi, “Mu zola Yandi.” Oh, Yandi kele ve mbote? Beno zaba, mu ke zolaka kaka kuvwanda kuna mpe kunwa kaka, na mutindu nionso, Mvwandulu ya Yandi. Ndinga ya Yandi, me basika, Ya me kubwa na kati ya bantima. Ya ke sungika beto. Ya ke nata beto na kutumama na Mpeve ya Yandi. Wapi mutindu ya kele kaka mbote na kusambila Yandi kuna! Ntangu yayi, mutindu beno ke basika na yinzo-Nzambi, na nkokila yayi, beno kwenda, na kusambilaka Yandi.

129 Mpe beno bambuka moyo, na sabala yayi, ya kele na lukutakanu ya bisambu awa na Kilumbu ya tatu na nkokila. Beno zimbana ve émission ya Mpangi Neville na radio na Lumingu, to na Kilumbu ya sambanu, na ngunga ya yivwa, na WLRP. Mu ke zolaka kuwa yawu, beno ve? Kimvuka ya bayimbi yiya, to kimvuka ya bayimbi tatu, ya ke wakanaka kitoko mingi. Kento ya munu mpe munu, mpe bana, beto nionso ke basisa mwa radio yango mpe—mpe beto ke vukana kintwadi pene-pene ya yawu, samu na kuwa Mpangi Neville mpe émission ya yandi na radio, mpe bandinga ya yandi ya kitoko, wapi mutindu yandi ke kembila Nzambi yina yandi ke zolaka mpe ke kwikilaka. Mu ke tuba yayi ve na . . .

130 Beno banzenza yina kele awa, kana beno kele ve na yinzo-Nzambi ya beno, beno kwisa vukana na beto. Mu ke tuba na beno, mu ke tuba yawu ve samu yandi kele awa. Ve, tata. Mu ke tubaka yayi, ntangu nionso. Mu ke zolaka Mpangi Neville. Na kubanda, ntete, yandi kele théologien. Kima ya ntete, yandi kele mwana ya Nzambi. Kima ya kulanda, yandi kele mutindu mosi konso kilumbu. Mu me zaba yandi kubanda bamvula mingi. Yandi me sobaka ata fioti ve, ata fioti ve. Yandi kele kaka Orman Neville, kisadi ya Mfumu Yesu. Mpe mu banza yandi me . . .

¹³¹ Na nkokila yina, mu bokilaka na allo-allo, samu na kulomba yandi kana yandi lendaka ve, na manaka ya yandi, lendaka pesa beto mwa kivinga ti beto kwisa sambila samu na bambevo. Ya kele na bayankaka me kwisa, na suka yayi, beno zaba. Mpe kento ya yandi ya fioti pesaka mvutu na allo-allo, mpe mu vwandaka solula na kento ya munu, kuna na manima, samu na yawu.

¹³² Mpe wapi mutindu beto ke vutula matondo na Nzambi samu na kento ya yandi ya fioti ya lutondo mpe dibuta ya yandi. Ba kele mbote mingi. Ntangu beno ke mona longi mosi na kento ya yandi ke wakana mutindu yina, na lembami mpe kukikulumusasa, yina ke sala ti dibuundu kutambula mbote mingi. Ya kele kaka ya lembami konso kilumbu.

¹³³ Beno ke zolaka Yandi na ntima ya beno ya muvimba? Mbote mingi. Beto kele na nkunga yina beto ke yimbaka samu na kusukisa, *Baka Nkumbu Ya Yesu Na Nge*. Mpe pesa beto mwa note, mpangi-kento, kana beno kele na yawu kuna na kati ya buku. Mpe beto ke yimba nkunga ya beto samu na kusukisa. Mpe ntangu beto ke yimba nzila ya ntete, beto zola baluka, samu na kupesana mbote mosi na yankaka. Mbote mingi. Pesa beto note.

. . . Nkumbu ya Yesu na nge,
 Mwana ya mawa mpe ya kiadi;
 Yawu ke pesaka nsayi mpe ke pesa nge kikesa,
 Baka yawu bisika nionso nge ke kwenda.
 Nkumbu ya ntalu, Oh Nkumbu ya mbote!
 Kivuvu ya ntoto mpe kyese ya Mazulu;
 (Nzambi sakumuna nge, mpangi-bakala.)
 Nkumbu ya ntalu, Oh Nkumbu ya mbote!
 Kivuvu ya ntoto mpe kyese ya Mazulu.

Beto baka nzila yayi ntangu yayi:

Beto ke fukimina Nkumbu ya Yesu,
 Beto ke fukama na makulu ya Yandi,
 Samu na kubyadisa Yandi Ntinu ya bantinu na
 Mazulu,
 Ntangu nzietolo ya beto ke suka. (Ya ke
 vwanda mbote ve?)
 Ya ntalu. . . (Nkumbu ya ntalu!) Oh Nkumbu
 ya kitoko!
 Kivuvu ya ntoto mpe kyese ya Mazulu;
 Nkumbu ya ntalu, (Nkumbu ya ntalu!) Oh
 Nkumbu ya lembami!
 Kivuvu ya ntoto mpe kiese ya . . .

¹³⁴ Bantu yikwa ke bambuka moyo na mwa nkunga yina beto vwandaka yimbila, *Beno Zimbana Ve Bisambu Na Dibuta?* Beno ke bambuka moyo na yawu? Mu kele ve. . . Thelma, kana nge me zaba yawu, to nge me zaba note ya yawu, to ve? Beto meka yawu mbala mosi. Beno ke bambuka moyo na yawu ve? Beto. . . Ntangu yankaka mu lendaka meka yawu kintwadi na beno.

Beno zimba ve bisambu na dibuta,
 Yesu ke zola kukutana na beno kuna;
 Yandi ke katula mawa ya beno nionso,
 Oh, beno zimbana ve bisambu na dibuta.


¹³⁵ Bantu yikwa ke salaka bisambu na dibuta? Ya kele mbote. Beto meka yawu diaka. Mu ke vutukila yawu awa. Mu ke zolaka yawu. Beto nionso kintwadi ntangu yayi:

Beno zimbana ve—beno zimbana ve bisambu
 na dibuta,
 Yesu ke zola kukutana na beno kuna;
 Yandi ke katula mawa ya beno nionso,
 Oh, beno zimbana ve bisambu na dibuta.

¹³⁶ O Mfumu, ya me sonama na kati ya Masonuku, ti ba vwandaka baka bamuswale to bitanda yina simbaka nzutu ya Paul, mpe bampeve ya yimbi vwandaka basika na bantu, mpe bimbevo vwandaka beluka. Beto ke sambila, O Mfumu, ti ya ke vwanda mutindu mosi samu na bantu yayi ba ke ntetika yawu, na nkokila yayi, mutindu ba ke fidisa yawu na bantu yina kele na nsatu mpe na bambevo. Kisika mosi kuna na bayinsi, ya kele na muntu mosi ke vingila yayi na ntima tiya-tiya. Mu ke sambila, Tata, ti Nge ke pesa yawu na Nkumbu ya Yesu, Mwana ya Nge. Amen.

¹³⁷ Ntangu yayi mu ke lomba, mutindu beto me kulumusa bayintu ya beto, kana Mpangi ya beto Smith ya ntalu mingi kuna, ya Dibuundu ya Nzambi, yina beto me mona, kaka mutindu Mpangi ya beto Neville awa, mutindu kisadi ya Nzambi ya kieleka, ya kwikama, Mu ke lomba na yandi na kulomba ti masakumunu kuvwanda na zulu ya beno, na sabala yayi ke kwisa. Nzambi sakumuna beno tii beto ke kutana diaka.

¹³⁸ Mpangi Smith. [Mpangi Smith ke sambila—Mu.] Yinga, Mfumu. Pesa yawu, Mfumu. Yinga. Yinga. Yinga. Yinga. Amen.

¹³⁹ Beno pesana mbote mosi na yankaka. Na kiesa ya kumona beno diaka, na tabernacle. Nzambi sakumuna beno. 

NANI KELE MUNTU YAYI? KNG59-0510E

(Who Is This?)

Nsangu yayi ya Mpangi William Marrion Branham, kulongamaka na Kingelesi, na Kilumbu ya Bamama, na Lumingu na nkokila, na kilumbu ya 10 ya Ngonda ya tanu, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org